

daruon; so lasset jn nun hinfaren zum Teuffel, dahin gehöret er, dann er ist der Antichrist, wie wir hernacher klerlich erweisen wollen.

Vnd jhr Euangelischen fürsten, die jhr das Euangelion Jhesu Christi angenommen habt, stehet feste, trawet Gott vnd fürchtet euch nicht! Lasset jhn handeln vnd die sache vortedingen, dann die sache ist nicht [C 1r:] vnser, dann
5 allein sein. Betet aber, lernet sein wort, bessert ewer leben vnd wartet ewer regierung,⁸² darnach last es Gott walten, et ipse fatiet.⁸³

Jhr andern fürsten aber, die jhr das Euangelion Christi erkant vnd angenommen,^e nun aber daruon^f vor fürcht, in schaden zu fallen: Wisset, das euch der
10 heilige Geist entzogen; dann in den heiligen Geist habt jhr gesündigt vnd die erkante warheit vorleugent. Gott, der allezeit barmhertzig ist, erbarm sich ewer; ist es sein göttlicher wille, so bekere er euch. Seit gewarnet, keret vmb, erkennet ewern grossen, grewlichen fall, last es euch leit sein, thut warhafftige buse; es ist noch kurtze zeit! Kompt das stündlein des zorns, so
15 ist alle gnade, barmhertzigkeit, alles bitten vnd flehen vmbsunst. Haltet euch zu dem Euangelio vnd warem gottesdienst, lasset das Bapstumb vnd INTERIM fahren, dann auch vor ewer land, leuthe vnd arme vnterthane, die durch ewer exempel zum högsten geergert werden, müsset jhr im stündlein des zorns rechenschafft geben; da wirt keinen weder Keiser, König, Fürst,
20 Her, Bischoff oder Pfaff erlösen, sondern es mus des gestrengen gerichtes Jhesu Christ gewartet sein.

Jhr andern Potentaten, die jhr noch dem Römischen stul anhengig vnd euch den schönen vnd geferbten, geschmierten vnd gezirten, gesungen vnd geklungen, gegeigen vnd gepfiffen falschen, abgöttischen dienst [C 1v:] des
25 Antichrists wolgefallen lasset vnd dem geschlagen heupt vnd stinckenden leib helffet vnd rateth: Wisset, das jhr von seinem stancke sterben werdet; vnd gleich wie jhme nicht wirt geholffen werden, also werdet jhr auch keine rettung haben. Seit fursichtig vnd klug, ich hab es euch gesagt.

Du ander armes heufflein Jhesu Christi, sey stille, warte deines Herren, höre
30 sein wort vnd lerne es, sey getrost vnd fürchte dich nicht, dann der Bapst, der Antichrist, sampt dem INTERIM sein gerichtet, geschlagen vnd vmbbracht; las vollent verzappeln,⁸⁴ es wir nicht lange waren,⁸⁵ so sein sie gar todt. Die Prophecey des lieben Apostels Pauli hat müssen erfüllet werden vnd ist nun erfüllet. Gott hat sie mit dem geiste seines Munds vmbbracht.
35 Denck nur nicht, das sie bleiben vnd fortan leben können oder mügen. Sonst

^e ergänze: hattet.

^f ergänze: abgefallen seid.

⁸² nehmt euch eurer Regierungsgeschäfte pflichtgemäß an. Vgl. Art. warten II.D.5.c), in: DWb 27, 2142f.

⁸³ Vgl. Nah 1,9.

⁸⁴ zu Tode zappeln. Vgl. Art. verzappeln 1.c), in: DWb 25, 2441.

⁸⁵ währen, dauern.